

吳興藝文補

吳興藝文補卷之十三目錄

宋

太宗

通慧大師進高僧傳批答

通慧名贊寧德清人

徽宗

宣和封陸簡寂真人誥

見前

高宗

追贈沈疇直龍圖閣訓詞

沈疇德清人

沈濬除監察御史訓詞

沈濬疇子

孝宗

賜臨安府尹周淙詔
周淙長興人

付張澈
郡守

問陳侃
爲郡人章沖

沈清臣被責因依
沈清臣烏程人

寧宗

祭崇憲靖王伯圭文
伯圭嗣秀王居湖

崇憲靖王輓祭文

度宗

追贈濟王御劄

濟王名竑舊太子降封居鄆

王禹偁

左街僧錄通慧大師文集序

與釋贊寧書

釋贊寧

見前

進高僧傳表

有宋高僧傳序

惠力寺記

結社法集文

筭譜

范仲淹

奏爲薦胡瑗充學官

與省主葉內翰書二首

葉內翰名濟臣烏程人

祭葉翰林文

同上

韓琦

長兄德清尉墓誌銘

蔡襄

回湖州郡徐郡中得替啓

名仲謀

太常博士致仕胡君墓誌

胡瑗

歐陽修

前漣水軍判官吳知幾可大理寺丞制

吳知幾安
吉人

著作佐郎盧革磨勘改官制

盧革德清人

梅聖俞詩集序

聖俞名堯臣監湖州鹽稅

後漢費鳳碑跋

費鳳見前

後漢費府君碑跋

唐沈傳師游道林嶽麓寺詩跋

唐復東林寺碑跋

爲監司崔黯

唐韓愈羅池廟碑跋 爲沈傳師書

唐韓愈黃陵廟碑跋 同上

唐景陽井銘跋 爲陳後主

唐于祿字樣模本跋二首 見前

唐陸文學傳跋 寓公陸羽

唐顏真卿射堂記跋 郡碑

唐湖州石記跋

唐高閑草書跋

答孫正之 作二首 孫侔吳興人寓揚州

朱臨 烏程人

三高贊

釋仁岳 烏程賜號淨覺

阿彌陀經新疏序

觀自在菩薩如意輪咒課法序

如意輪咒課法釋疑

義學編序

論席解紛

胡宿 郡守

乞爲謝安置守冢禁樵採表

冢在長興

李觀

上葉學士書

葉清臣

葉清臣

見前

御書閣碑

備邊策略

余靖

姚壽論

見前

王安石

陳聖俞祕書丞制

陳聖俞烏程人

前鄉貢進士許將大理評事簽書昭慶軍節度判

官廳公事制

宋景祐元年改宣德軍爲昭慶軍

舉陳樞充錢穀職司狀

陳樞長興人

送孫正之序

通判海門與利記

爲郡人沈興宗

與孫侔書三首

答孫少述書

卽正之

謝林肇長官啓

林肇吳興人

朝奉郎尚書司封員外郎張君墓誌銘

張名禔墓
卞山

釋淨端

歸安人自號安閑和尚

祭銀青章相公文

劉誼

長興人

湖州吳山端禪師語錄序

請端禪師住持長興壽聖禪寺疏

曾公巖記

釋契嵩

與陳公與賢良書

今舉聖俞字

十三卷目錄終

吳興藝文補卷之十三

烏程董斯張遐周彙編

閔元衢康侯叅輯

韓千秋聖開增定

宋

通慧大師進高僧傳批答

太宗

勅通慧大師贊寧省所令左街天壽寺賜紫僧顯忠進
編修有宋高僧傳三十卷事具悉一乘妙道六度玄門
代有奇人迭恢聖教若無纂述何以顯揚繁爾真流棲
心法苑成茲編集頗効辛勤備觀該摠之能深切歎嘉

之意其所進高僧傳已令僧錄司編入大藏今賜絹三千匹至可領也故茲獎諭想宜知悉冬寒想比清休否遺書指不多及

宣和封陸簡寂真人誥

徽宗

朕儀前古高蹈之士名迹不泯而稱號未稱者所以追頌之簡寂先生陸修靜真精內得遺經垂範而脫然超世廬阜故隱有祠至今考實定名禮以真人之號非特用褒往躋亦俾後之聞風者知道之所在而勉焉可特封卅元真人

追贈沈疇直龍圖閣訓詞

高宗

士有屈於生前而伸於歿後方其臨事執義以行其志
亦奚暇擇利害於當時而與顯榮於今日哉是可嘉歎
也爾以直道佐御史府執憲不回是爲稱職而擅權誤
國之人方且嫉惡排斥之今公論得明昭爾積年之無
辜使離沒世而不泯龍圖寓直職號清華精爽向存歆
予復寵

沈濬除監察御史訓詞

高宗

先皇帝有賢御史以議獄不撓忤柄臣至於流落以死

朕嘗伸褒錄之典思其人而不及見况有令子克濟其
美者哉以而樂道修身勇於爲善義冠在列有粹然安
靜之風朕旣知之矣賜覲昕廷察言可用其以柏寺雄
職爲子司總紹爾家聲則名稱報

賜臨安府尹周淙詔

孝宗

幾方千里俗具五民趨利者率多巧僞亡身者公肆奪
非關之以義守之以信求圉圉之空未易得也卿以
吾上嗣尹正是司布政以來風流篤厚禁網疏闊刑罰
用稀今焉俾無一人之獄足以副吾欽恤之意矣賀章

來上嘉歎不忘

付張澈

孝宗

湖州輔郡之重治劇抑強全賴風力卿其勉之

問陳侃

孝宗

聞淮東水寨人陳侃爲章冲所窘今送安撫司根勘此
係邊而人心如何可以與免根治給付本人船隻却奏
來

周必大回奏

臣伏準御筆詢問淮東水寨人陳侃爲章冲所窘今

送安撫司根勘事臣記得今年正月知楚州章冲窮
治鹽城民戶陳本打造海船軍器下海與販一面結
案合斷徒罪又乞重賜施行三省降付荆寺擬斷間
因本家經密院下狀乞移他處別勘臣以本人既是
民兵百領事關防難與尋常打船下海私置軍器一
例行遣遂於今月初八日將上奏陳謂太守治部民
固難沮抑而邊防所繫亦當闊略欲移鄰郡楊州根
勘仍具情犯申樞密院乃是從其所請可作出場當
時蒙聖諭以爲允當卽已行下聞鄭良嗣與曉此意

勢必兩平其事只候申到便奏知可以恕免仍給船隻今聖意若欲早了卽來早面奏再降指揮催促楊州申來於本人決無所損伏乞睿照

沈清臣被責因依

孝宗

沈清臣當時上書被責忘記所言何事卿路奏大槩來更不須檢討真本

周必大回奏

臣伏蒙聖問記得是投匭上書論王希呂本歸正人不合用爲諫官諫院以希呂乃所隸不敢受清臣卽

錄本呈宰執臺諫虞允文怒奏其事兼疑沈介教之
奏送大理寺鞠勘鍛鍊久之元非沈介教唆遂坐書
未進御而謄本示人編管封州伏乞睿照

祭崇憲靖王伯圭文

寧宗

藝祖造邦源深流長子孫繩繩百世其昌巖巖秀邸不
顯其光積久愈厚篤生賢王濯濯祥麟玉質金相允文
孝宗則友其兄召繇外藩賜第于京廼分茅社于彼榮
陽赤旂金節絢爛綏章文考念功曰篤不忘建祠秀園
舊履是荒太師維垣來衣煌煌爰暨冲人應龍初翔宣

方百爲調娛多方予嘉乃勳臚句不名紫微是亦遼遼
勿違貴極愈謙年耄益莊踰七望八熾昌壽臧子侍孫
携蟬冕相望王比來朝精神方彊謂當百年鎮此宗盟
不遠伊邇降此弗祥維大父行生歿哀榮王實無憾典
刑云亡緘辭往奠寄哀一觴

崇憲靖王輓祭文

寧宗

我伯祖父標的宗英奉釐列邸隱然維城天胡忍予殲
此老成爰飭拜興命使以行遙致奠葦以賁泉扃爰以
量幣清酌齊牲粢盛庶品用薦哀誠

追贈濟王御劄

度宗

濟王生前之官先帝已與追復尚有未復所贈官嘗曰
畱以遺後人卽仁皇踐祚贈秦王太師尚書令之典也
所宜繼志以慰泉壤可追復太師保靜潼軍節度使仍
令所屬討論墳塋之制日下增修餘照先帝端平元年
六月十二日旨揮

左街僧錄通慧大師文集序

王禹偁

釋子謂佛書爲內典謂儒書爲外學工詩則衆王
文則鮮并是四者其惟大師大師世姓高氏法名贊寧其先

渤海人隋末徙居吳興郡之德清縣祖瑀考審皆隱德
不仕母周氏以唐天祐十六年歲在己卯某月某日生
大師于金鷺山別墅時梁貞明七年也武肅王錢鏐專
制江浙後唐天成中出家清泰初入天台山受具足戒
習四分律通南山律長興三年武肅薨文穆王元瓘嗣
位大師聲望日隆文學益茂時錢氏公族有若忠懿王
俶宣德節度使湛奉國節度使億越州刺史儀金州觀
察使儼故工部侍郎昱與大師以文義切磋時浙中士
大夫有若衛尉卿崔仁冀工部侍郎慎知禮內侍致仕

楊惲與大師以詩什唱和又得文格于光文大師彙征
愛詩訣于前進士龔霖由是大爲流輩所服時錢塘名
僧有若契疑者通名數一支謂之論虎常從義者文章
俊捷謂之文虎大師多毗尼著述謂之律虎故時稱四
虎焉署本國監壇又爲兩浙僧統歷數十年像法脩明
緇徒整戢太平興國三年忠懿王攜版圖歸國大師奉
舍利真身塔入朝太宗素聞其名召對滋福殿延問彌
日別賜紫方袍尋改師號曰通慧故相盧朱崖深加禮
重叅知政事李穆儒學之外善談名理事大師尤爲恭

謹八年詔修大宋高僧傳聽歸杭州舊寺成三十卷進
鄒之日重書褒美居無何徵歸京師任天壽寺叅知政
事蘇易簡奉詔撰三教聖賢事迹奏大師與太乙宮道
士韓德純分領其事大師著驚顙聖賢錄又集聖賢事
迹凡一百卷制署左街講經首座至道元年知西京教
門事今上咸平元年詔充右街僧錄先是故相文貞公
懸車之明年年七十一思繼白少傳九老之會得舊相
吏部尚書宋琪年七十九左諫議大夫楊徽之年七十
五鄴州刺史判金吾街仗事魏丕年七十六太常少卿

致仕李運年八十水部郎中直秘閣朱昂年七十一廬
州節度副使武允成年七十九太子中允致仕張好問
年八十五大師時年七十八九人焉文貞公將讌于
家園形于繪事以聲詩流詠播於無窮會蜀寇作亂朝
廷出師不果而罷今九老之中李宋楊魏張已先逝矣
大歸年八十二視聽不衰于本國歷武肅文穆廢王忠
懿凡四世于朝歷梁兩帝後唐莊宗應順清泰晉高祖
少帝漢高祖隱帝周太祖世宗梁王我太祖英武聖文
神德皇帝我太宗神功聖德文武皇帝通今上凡十五

朝而能受法海嚮用之福處浮圖具瞻之地豈所謂必
得其壽必得其位者乎大師以述作頗多敘引未立猥
蒙見託不克固辭總其篇題具如別錄凡內典集一百
五十二卷外學集四十九卷覽其文知其道矣因徵其
世家行事備而錄之使後之傳高僧銘塔廟者于茲取
信云

與釋贊寧書

王禹偁

累日前蒙惠顧謏才辱借通論日殆三復未詳指歸徒
觀其滌繁露之瑕劇論衡之玷眼瞭獨斷之瞽鍼砭正

俗之疹折子玄之邪說泯朱頴之巧言遂光庭若摧枯
排孫卻似圖憂使聖人之道無傷於明夷儒家者流不
至於迷復然則師胡爲而來哉得非天祚素王而假手
於我師者歟

進高僧傳表

釋贊寧

臣僧贊寧等言自太平興國七年伏奉勅旨俾修高僧
傳與新譯經同入獻者臣等遐求事迹博採碑文今已
撰集成三十卷謹詣闕庭進上益琅函而更廣延玉曆
以彌長臣等誠憂誠恐兢惕之至臣等聞渾儀之外別

有釋天法海之中多生僧寶釋天可則阿難記事而載
言僧寶堪稱慧皎爲篇而作傳猗歟我佛號大徧知知
教法之無依委帝王之有力當二千載之後屬一萬年
之初伏惟應運統天睿文英武大聖至明廣孝皇帝陛
下神龍在天慶日升上土疆開闢四夷請吏而貢琛時
律均和百穀登放而棲畝耕籍田而又勸賜酺飲以咸
歡儒術特興玄風爰振是以麒麟非中國之物白雉非
草莽之禽今遊苑囿之間且顛牢籠之畜近以從瀼至
濮黃河牽一帶之清自古及今青史載千年之應斯蓋

陛下來從不動之地示爲長壽之王翻譯成經製甚深
之御序迴文作頌演無盡之法音仍降鳳書令編僧史
屬此雍熙之運伸其貞觀之風合選兼才豈當末學得
不檢犀截角翠刪毛精求出顛之人取法表年之史
所恨空門寡學釋胄何知或有可觀實錄聊摹於陳壽
如苞深矣矣經宜罪於馬遷副陛下遺賢必取之心助
陛下墜典咸修之矣今遇乾明聖節謹令弟子賜紫顯
忠同元受勅相國寺賜紫智輪進納伏乞睿慈畧賜御
覽恭惟聖主是文章之主微臣非惇史之臣儻示天機

令知凡例如得操北斗而斟酌或示刀圭執南箕而簸揚方除糠粃臣等冒黷天顏無任惶懼激切屏營之至謹言

有宋高僧傳序

釋贊寧

臣聞賢劫縣長世間宏廓天與時而不盡地受富以無疆最靈之氣翺于中大聖之師居于上偉哉釋迦方隱彌勒未來其間出命世之人此際多分身之聖肆爲僧相喜示沙門言與行而可觀槩兼觚而爭錄是以王巾僧史孫綽道賢摹列傳以周流象世家而布濩蓋欲希

顏之等慕蘭之儔成飛錫之應真作曳山之上士時則
裴子野著衆僧傳釋法濟撰高逸沙門傳陸杲述沙門
傳釋寶唱立名僧傳斯皆河圖作洪範之椎輪土鼓爲
咸池之坏甕焉知來者靡曠其人慧皎刊修用實行潛
光之目道宣緝綴續高而不名之風令六百載行道之
人弗墜于地者矣爰自貞觀命章之後西明絕筆已還
此作篋聞斯文將闕時有再至肅殺過而繁華來世無
久虛地天森而聖明出我應運統天睿文英武大聖至
明廣孝皇帝陛下陽龍挺德斗電均威踐大道也義黃

翰執御之勞多天才也周孔行弟子之職講信脩睦崇
德報功一統無遺百王有愧四海若窺於掌內萬機皆
發於宸衷然而玄牝留神釋天淡慮長生授術時開太
一之壇續法延期僧度倍千之戒浮圖渴漢梵策翻華
將佛國之同風與玉京而合制慨茲釋侶代有其人思
景行之莫聞實紀錄之彌曠臣等謬膺良選俱乏史才
空門不出於薰狐弱手難探於禹穴而乃循十科之舊
例輯萬行之新名或案誅銘或徵志記或問韜軒之使
者或詢耆舊之先民研磨將經論畧同讎校與書史懸

合勒成三帙上副九重列僧寶之瓌奇知佛家之富貴
昔者嘉祥筆削盡美善于東南澄照纂修足英髦于關
輔蓋是拘于墟也傳不習乎豈若皇朝也八極張羅舉
之則無物不至四夷弭伏求之則何事不供臣等分函
檢搜各塗構集如見一家之好且無諸國之殊所以成
十科者易同拾取其正傳五百三十三人附見一百三
十人矧復逐科盡處象史論以摠辭因事言時爲傳家
之系斷厥號有宋高僧傳焉庶幾乎銅馬爲式選千里
之駿駒竹編見書寶六和之年表觀之者務進悟之者

思齊登三藐之山悉入薩雲之海永資聖澤俱瞻皇
明齊受日之炳光應嵩山之呼壽云爾時端拱元年乾
明節臣僧贊寧等謹上

惠力寺記

釋贊寧

錢塘屬邑鹽官爲最在浙之朝陽爲吳之右臂白鋪江
練青點海門蜃樓起而躡疎橫星漢低而枯槎活潮生
信大雷霆藏龍戰之聲潤下功深蜀井喪虎形之味

結社法集文

釋贊寧

晉宋間有廬山慧遠法師化行潯陽高士逸人輻臻于

東林皆願結香火時雷次宗宗炳張詮劉遺民周續之
等共結白蓮華社立彌陀像求願往生安養國謂之蓮
社社之名始於此也齊竟陵文宣王募僧俗行淨住法
亦淨住社也梁僧佑曾撰法社建功德邑會文歷代以
來咸就僧寺爲法會社也社之法以衆輕成一重濟事
成功莫近於社今之供社共作福田修約嚴明愈於公
道行人互相激勵勤於修行則社有主養之功夫其近
聞周鄭之地邑社多結守庠申會初集鳴饒鉦唱佛歌
讚衆人念佛行道一夕不睡以避三彭秦上帝免注罪

奪算也然此實道家之法往往有無知釋子入會圖利
小利曾不尋其根本誤行邪法良可痛哉

筭譜

釋貫寧

採筭一日曰篤二日曰筵見風則觸本堅入水則浸肉
硬脫殼煮則失味生著刃則失柔採而停久非鮮也盛
而苦風非藏也抹之脫殼非治也淨之入水非洗也蒸
煮不久非食也

奏爲薦胡瑗充學官

范仲淹

臣聞臣之至忠莫先於舉士君之盛德莫大於求賢泰

通之朝豈敢隱默臣竊見前密州觀察推官胡瑗志窮
墳典力行禮義見在湖州郡學教授聚徒百餘人不惟
講論經旨著撰詞業而常教以孝弟習以禮法人人嚮
善閭里歎伏此實助陛下之聲教爲一代美事伏望聖
慈特加恩獎升之太學可爲師法

與省主葉內翰書二首

范仲淹

某頓首竊惟皇上念天下之計至大至重思得良大夫
主之故竊竊閣下之賢復有此拜而人莫能聞之憂國
者可不相慶然天下之計其難久矣自李唐中微天下

多事諸節度各聚州兵據征賦以自支故有尾大不掉之舉起矣此非唐之本謀但四方縱橫撲滅不暇故因其有功而分裂之蓋不得已也皇朝開造天下特重其弊重兵聚于京師至于諸節度之兵亦皆贍於度支誠長世之策也然祖宗之初約天下之入以周其用則倍有餘矣而八九十年間朝廷全盛用度日滋增兵頗廣吏員加冗府庫之灾土木之蠹夷狄之貪水旱之患又先王食貨之政霸王之畧變通之術不得行於君子而常規於羣吏則天下之計宜其難矣其出於孤平感遇

非淺亦嘗面陳君天下之計而應和者寡故不得行及其居外固當不復爲言今閣下再領太計必欲盡心爲國家遠圖是君子可行之時非羣吏之可杞也某欲筆削於左右請公自行之則慮措紳多言謂閣下力革前數君子之爲以結上意又欲言於朝廷俟當閣下主議之亦懼獲晚節躁言之謗以故遲遲而莫能發但媿致身有餘報國無狀爾願閣下熟念天下長久之計考前賢至當之論則必變而通之非俟某之云云也殘暑惟自重爲禱不宜某上

其敬近辱真誨荅以報之自信之心弗改于薄此金石
其誠對神明而無媿天下識者所以重道卿之高正爲
此矣然國之安危存亡繫于其人正人安則王室隆正
人危則天下憂故君子安其身而後動易其心而後語
所以身安而國家可保豈特厚於已耶漢李膺之徒黑
白太明而禁錮戮辱雖一身潔清千古不昧奈何邪正
相激速天下之禍漢室亦從而亡之僕以爲與國同憂
之人宜弗爲也如與國存亡則有視於鴻毛者豈特
輕其已耶今上睿聖至仁惟股肱協德則堯舜同功天

下爲壽前者數君子感遇激發而高議直指不恤怨謗
及羣毀交作一一斥去雖自信於心未足爲耻使太上
用忠之意謂吾道無可信者此不爲重乎道卿能不鑒
此宜其與國同憂無專尙名節而忘邦家之大則天下
幸甚幸甚不宜其頓首

祭葉翰林文

范仲淹

維皇祐元年己丑十月庫中朔日具位某謹致祭于故
內翰侍讀學士諫議葉公之靈嗚呼賢哉道卿鍾乎粹
靈秀格藐藐英采熒熒濬學偉文發於妙齡決策三篇

萬儒疎聽闕視霄路直步雲庭天然清流不雜渭涇西
垣北門大筆未停爲藩爲翰千澶千青迺牧京兆關輔
以寧再主大計實營實經慷慨國論冒於雷霆出守河
橋期歸闕庭一夕奄去天地冥冥嗚呼遭時甚盛得主
惟聖謂道必行謂事必正高節莫屈直言屢諍朝廷風
采偕紳輝映天子知人期以輔政弗諧而去能不曰命
嗚呼僕與公相知則相知心蓬瀛共舍切磋規箴蘓秀隣
邦唱酬謳吟相許道大交薦言深久要之意不爲浮沉
今也云亡絕絃於茱白髮相失清淚難禁音問一斷憂

愁百侵古之遺直千載猶欽生平之交情何以任哀哉
尚饗

長兄德清尉墓誌銘

韓琦

太師長子諱球字伯玉少有志氣泛覽經史務究大義
不爲章句之學每讀書見古人仗忠義建功立事者必
無不感慕其所爲好擬孟郊作五字句詩意思清遠
人多稱詠初以蔭補太廟齋郎選授湖州德清尉摘姦
奉法如老於從政者太師聞之事三此兒他日必爲能
吏吾家有望焉太師未亡前數月兄以疾卒時年三十

四娶陳氏生二子曄早亡公彥今爲太常寺太祝在官
以幹潔稱慶曆五年二月二十二日以兄從太師葬於
相州安陽縣新安村西塋之庫位子曄同塋焉惟兄高
識大誦宜副先公之言以興我宗不幸初仕而夭可謂
命矣銘曰人無壽夭貴乎續嗣之賢兄今有子矣夫何
恨焉

回湖州知郡徐郎中得替啟

蔡 襄

伏審膺十行之札榮被代還奉三年之成旋登課最矧
霽溪之雅俗擁吳會之故墟耳剽風聲頗光朝選辱珍

題之見貺詠厚意之周勤披晤匪遙敷敘奚旣

太常博士致仕胡君墓誌

蔡襄

胡氏世居長安詢爲唐兵部尙書其孫韜因亂留蜀爲
僞蜀陵州刺史蜀平歸京師終衛尉卿於君爲曾祖生
恭州司寇叅軍諱修已卒塋海陵司寇生寧海軍節度
推官諱訥贈太子中允博學善屬文呂文靖公夷簡嘗
薦其書備修國史君其長子也諱瑗字翼之少有氣節
顯意經學兼通律呂之法力貧以撫昆弟之孤愛義良
厚景祐中范文正公仲淹上言君知古樂石見論樂拜

試秘書省校書郎康定初元吳寇避陝西帥以辟爲丹
州推官後移密州觀察推官丁父憂舉其族之亡於遠
者九喪歸塋服除遷保寧軍節度推官治湖州州學又
召教授諸王宮病家辭免遂以太子中舍致仕泛恩改
殿中丞驛召會秘閣議樂除大理評事兼太常主簿尋
復解罷歲餘授光祿寺丞國子監直講仍與議樂樂成
改大理寺丞賜緋魚嘉祐元年遷太子中允充天章閣
待講旣而疾不能朝拜太常博士還官政從其子志康
杭州節度推官以就養四年六月六日終于杭州享年

六十有七明年十月五日葬於湖州烏程何山之原毋
隨氏贈京兆縣太君娶王氏封長安縣君有子三人志
康進士及第志寧志正皆力學長女婚大理寺丞滕希
魯次進士王伯起季女尚幼孫守約君孤進所立不恤
權貴義以自信本朝承周用樂其聲高不合中和太祖
皇帝嘗詔下一律而未遑制作天子知樂命李照等修
之君初得對崇政廷辨照等所修樂非是詔令改作未
幾報罷及會秘閣議按周禮以正鐘律爲正聲悉列爲
九等參其中者爲仄仄定而律成驗之比舊下一律於

是徹前樂而新之天子臨紫宸鐘磬在廷天子曰學者
能通典故而不能知聲工者習其聲之傳而不知制鼗
之理斯難能也先有議罇鐘當有大小今與黃鐘一之
非古制乃用倍半之法作應鐘至是鐘成特小小者不
堪備宮縣諸儒侍從無異議者天子可之用於郊廟又
令作皇祐新樂圖記布之天下蓋精二十年而後成其
間同議論皆貴官老儒相抵止者豈一二哉然君未始
恤之也尤患隋唐已來仕進尚文詞而遺經業苟趨祿
利及爲蕪湖二州教授嚴條約以身先之雖大暑必公

服終日以見諸生設師弟子之禮解經至有要義懇懇
爲諸生言其所以治已而後治人者學徒千數日月
括牖爲文章皆傳經義必以理勝信其師說敦尚行實
後爲太學四方歸之庠舍不能容旁拓步軍居署以廣
之五經異論弟子記之自爲胡氏口義侍邇英講不以
諱忌爲避旣疾上數遣中貴人就問安否蓋亦有所待
矣比去京諸生詣闕下乞留者累日公卿祖送都門甚
盛莫不惜其行也君雖老於訓導在丹州實與帥府事
建議更陳法治兵罷開廢地爲營田募土人爲兵給錢

使自市勁馬漸以代東兵之不任戰者雖軍校蕃酋亭障廝役以事見輒飲之酒訪被邊利害以資帥府府多武人初謂君徒能知古書耳既觀君之所爲不以異已又翕然稱之君雋材而行篤卒艱勤以歿所著資聖集十五卷藏於家嗟乎世之有志於道以身法世莫不欲致之於用推之於遠然才德之士多亦蹇軋難通豈不有命乎君不鄙小官進不及用功於誨人其施博矣晚乃得侍天子左右若將有爲輒病以廢豈人事也哉謹

誌

前連水軍判官吳知幾可大理寺丞制

歐陽脩

勅具官吳知幾士之飭躬勵行以勤厥官未有不知於人者知而薦之吾亦無所遺焉惟爾之能數有稱道有司較最於格當升勉膺新恩無廢其業可

著作佐郎盧革磨勘改官制

歐陽脩

勅具官盧革等州縣之職治有常法而達方之俗風土異宜若夫上克奉於教條下不違於民欲惟勤與敏乃克濟焉爾等服職有勞曾課來上膺茲敘進無費官箴

可

梅聖俞詩集序

節文

歐陽修

聖俞文章簡古純粹不求苟說於世世之人徒知其詩而已然時無賢愚語詩者必求之聖俞聖俞亦自以其不得志者樂於詩而發之故其平生所作于詩尤多世既知之矣而未有薦於上者昔王文康公嘗見而歎曰二百年無此作矣雖知之深亦不果薦也若使其幸得用於朝廷作爲雅頌以歌詠大宋之功德薦之清廟而追商周魯頌之作者豈不偉歟奈何使其老不得志而

爲窮者之詩乃徒發於蟲魚物類羈愁感歎之言世徒
喜其工不知其窮之久而將老也可不惜哉聖俞詩旣
多不自收拾其妻之兒子謝景初懼其多而易失也取
其自洛陽至於吳興已來所作次爲十卷予嘗嗜聖俞
詩而患不能盡得之遽喜謝氏之能類次也輒序而藏
之其後十五年聖俞以疾卒于京師予旣哭而銘之因
索于其家得其遺藁千餘篇并舊所藏掇其尤者六百
七十七篇爲一十五卷

後漢費鳳碑跋

歐陽修

右漢費鳳碑云字伯蕭梁相之元子也漢安二年舉孝廉拜郎中除陳國新平長又云試守故鄉長其文班班可見而卒葬年壽皆不載其後悉爲五言韵語其畧曰不悟奄忽終藏形而匿景耕夫釋耒耜桑女投鉤管道阻而且長起坐淚如雨不悉錄熙寧二年十一月十六日山齋書

後漢費府君碑跋

歐陽修

右漢梁相費府君碑其名字若云諱況字仲慮而況疑爲汎慮疑爲寬其官闕可見者爲蕭令九年沛有蝗獨

不入其界國以狀聞朝廷嘉諸拜梁相春秋八十卒其
銘頗簡而文字麤完云蘇蘇顯祖厥德懿鑠播勛於前
丕碩基業遺愛於民福流於後胙自此磨滅不可識者
八字其卒章云功烈休矣來昆勦力而穆字爲蘇古文
多然熙寧二年十一月十六日山齋書

唐沈傳師游道林嶽麓寺詩跋

歐陽修

右嶽麓寺詩沈傳師撰并書題云酬唐侍御姚員外而
二人之詩不見不知爲何人也獨此詩以字畫傳于世
而詩亦自佳傳師書非一體此尤放逸可愛也

衢按侯鯖錄得唐詩并識其題云儒林郎監察御史
唐扶

唐復東林寺碑跋

歐陽修

右唐湖州觀察使崔黯撰柳公權書東林寺會昌中廢
之大中初黯爲江州刺史而復之黯之文辭甚道麗可
愛而世罕有之

唐韓愈羅池廟碑跋

歐陽修

右羅池廟碑唐尚書吏部侍郎韓愈撰中書舍人史館
修撰沈傳師書碑後題云長慶元年正月建按穆宗實

錄長慶二年二月傳師自尚書兵部郎中翰林學士罷
爲中書舍人史館修撰其九月愈自兵部侍郎遷吏部
碑言柳侯死後三年廟成明年愈爲柳人書羅池事子
厚以元和十四年卒至愈作碑時當是長慶三年考二
君官與此碑亦同但不應在元年正月蓋後人傳模者
誤刻之爾今世傳昌黎先生集載此碑文多同惟集本
以步有新船爲陟荔子丹今蕉黃蕉下加子當以碑爲
是而碑云春與猿吟而秋鶴與飛則疑碑之誤也

唐韓愈黃陵廟碑跋

歐陽修

右黃陵廟碑韓愈撰沈傳師書昌黎集今大行於世而
思本不真余家所藏最號善本世多取以爲正然時時
得石刻校之猶不勝其舛謬是知刻石之文可貴也不
獨爲翫好而已黃陵碑以家本校之不同者二十餘字
如家本言降小君爲夫人而碑云降小水之顙皆當以
碑爲正也

唐景陽井銘跋

歐陽修

右景陽樓下井銘不著撰人名氏述隋滅陳叔寶與張
麗華等投井事其後有銘以爲戒又有唐江寧縣丞王

震井記云井在興嚴寺其石檻銘有序稱余者晉王廣也其文字皆磨滅僅可識其十一二叔寶事前史書之甚詳不必見於此然錄之以見煬帝躬自戒陳目見叔寶事又嘗自銘以爲戒如此及身爲淫亂則又過之豈所謂下愚之不移者哉今其銘文隱隱尚可讀處有云前車已傾負乘將沒者又可歎也

唐于祿字樣模本跋二首

歐陽修

右于祿字樣模本顏真卿書楊漢公模真卿所書乃大曆九年刻石至開成中遽已訛缺漢公以謂一二工人

用爲衣食之業故摹多而速損者非也蓋公筆法爲世楷模而字書辨正僞繆尤爲學者所資故當時盛傳於世所以模多爾豈止工人爲衣食業邪今世人所傳乃漢公模本而大曆真本以不完遂不復傳若顏公真蹟今世在者得其零落之餘藏之足以爲寶豈問其完不完也故余并錄二本金藏之亦欲俾覽者知模本之多失真也

右顏魯公千祿字書乃大曆九年刻石至開成中遽已訛缺蓋由公筆法爲世楷模而字書辨正僞繆尤爲學

者所資而當時盛傳於世爾漢公謂一二工人用爲衣食之業者惜其傳模多而早損然豈止爲工人爲衣食業也今世人多傳漢公模本而大曆真本以不完遂不復傳若顏公真蹟今世在者得其零落之餘藏之充足爲寶豈問其完不完也故余并錄二本並藏之亦欲俾覽者知模本之多失真也治平元年正月五日錫慶院賜壽聖節宴歸書

唐陸文學傳跋

歐陽修

右陸文學傳鴻漸自撰茶之見前史蓋自魏晉以來有

之而後世言茶者必本陸鴻漸蓋爲茶著書自其始也
至今但俗賣茶肆中嘗置一瓷偶人於壁側云此號陸
鴻漸鴻漸以茶自名於世久矣考其傳著書頗多曰君
臣契三卷源解三十卷江表四姓譜十卷南北人物志
十卷吳興歷官記三卷湖州刺史記一卷茶經三卷占
夢三卷其多如此豈止茶經而已哉然其他書皆不傳

唐顏真卿射堂記跋

歐陽修

右射堂記顏真卿書魯公在湖州所書刺于石者余家
集錄多得之惟放生池碑字畫完好如干祿字書之類

今已殘闕每爲之歎惜若射堂記者最後得之今僕射
相公筆法精妙爲余稱顏氏書射堂記最佳遂以此本
遺余以余家素所藏諸書較之惟張敬因碑與斯記爲
尤精勁惜其皆殘闕也

唐湖州石記跋

歐陽修

右湖州石記文字幾闕其存者僅可識讀考其所記不
可詳也惟其筆畫奇偉非顏魯公不能書也公忠義之
節明若日月而堅若金石自可以光後世傳無窮不特
其書然後不朽然公所至必有遺蹟故今處處有之唐

人筆蹟見於今者惟公爲最多視其鉅書深刻或托於
山崖其用意未嘗不爲無窮計也蓋亦有趣好所樂爾
其在湖州所書爲世所傳者惟千祿字放生池碑尚多
見於人家而千祿字書乃楊漢公摹本其真本以訛遂
不復傳獨余焦錄有之惟好古之士知前人用意之深
則其堙沉磨滅之餘尤爲可惜者也

唐高閑草書跋

歐陽修

高閑草書鑑如此則韓子之言爲實錄矣

答孫正之

仲二首

歐陽修

修曰孫生足下丁元珍書至辱所示書及雜文二篇辭
博義高而不違於道甚喜甚喜元珍言足下好古自守
不妄接人雖居鄉閭罕識其面其特立如此而乃越千
里以書見及若某者何似當之豈足下好忽近而慕遠
邪得非以道見謀不爲遠近親疎然者也僕慙學不足
以自立而氣力不足以動人而言不見信於世不知足
下何爲而見及豈足下所取信者丁元珍愛我而過譽
邪學者不謀道久矣然道固不第廢而聖人之書如日
月卓乎其可求苟不爲刑禍祿利動其心者則勉之皆

至也惟足下力焉而不止則不必相見以目而後可
知其心相語以言而後可盡其說也以所示來札足下
之志苟不惑而止則僕將見足下大發于文著于行而
質於行事以要其成焉

修再拜人至辱書甚勤前年丁元珍得所示書喜吾子
之好學自立然未深相知及得今書乃知吾子用心如
此僕與吾子生而未相識而徒以一言相往來而吾子
遽有愛我之意欲戒其過使不陷于小人此非惟朋友
之義乃吾父兄訓我者不過如此也僕自知何足愛而

吾子所慶者道也。世之知道者少，幸而有焉，又自爲過失，以取累，不得爲完人。此吾子之所悉也。僕知道晚三十以前，尚好文華，嗜酒歌呼，知以爲樂而不知其非也。及後學識聖人之道，而悔其往咎，則已布出而不可追矣。聖人曰：勿謂小惡爲無傷，言之可愼也。如此爲僕計者，已無奈何。惟有力爲善，以自贖。爾書曰：改過不吝，書不義成湯之過，而稱其能改，則所以容饒。世之能自新者，聖人尚爾，則僕之改過而自贖，其不晚也。吾子以謂如此可乎？尚爲未可，則願有可進可贖之說，見教。吾子

待我者厚愛我者深惜乎未得相見以規吾子之所未
至者以報大惠蓋其他不足以爲報也值多事不予細

三高贊

朱 臨

矯矯朱公當世英雄卓然先識力避成功種也不悟語
已旋凶越壤千里齊祿萬鍾取如拾芥棄若飄蓬五湖
長往千載清風

翹翹季鷹江東步兵抗心世務俛首塵纓顧時多艱無
日昇平秋風動地鱸膾馳情載惟羊酪不似蓴羹終焉
故國江水長清

熒熒魯望志履疎曠時謂散人自比元亮清不耻耕貧
不輟釀簞笠扁舟煙雲白浪皓首叢書焦心絕唱遺編
如新可見高尚

阿彌陀經新疏序

釋仁岳

或曰虛空無涯世界無量其間有凡有聖有淨有穢何
爲其然乎曰妄念而然也真則不然諸佛證真空界殞
裂至論應化身土之事亦隨衆生妄念所感蓋使夫革
凡成聖捨穢取淨然後純純乎如諸佛之證也噫衆生
之妄也久矣故我佛能仁氏起無緣慈悲出堪恐世界

以若干方便開諸度門繇是五時設教三乘授道雖頓漸不同同歸于理其有我佛未度而度在他佛者則彌補處之有慈氏極樂之有彌陀乃至十方清淨國土示若鏡像導如津梁隨其所應利有攸往然而補處雖近十方俱遠諸大乘經莫不稱讚乎極樂爲最彌陀爲勝依正旣異壽命且長衆生信而願生者多矣神化之蹟聚在羣籍佛言將來法滅惟留無量壽經住世百年天台云當知彼佛於此惡世偏有緣爾茲經也始慈恩法師嘗有誤釋復有疏本亦題基公之名相傳云此無名

師假託而行也校其文旨實大同而小別洎孤山中庸
子章句後出盛傳于時以病中援毫詞簡義畧凡周敷
訓似未盡於方等之詮乎走不敏探智者之教頗歷歲
紀常欲以一家法要并淨土諸說覆述斯文竊避人之
多忌未果所志年邁耳順退藏故園伏念玉泉報恩九
旬揮於犀柄圭峯思孝七月薦於蘭盆緬挹清芬遂獲
操筆毫底析爲上下以新䟽目之別舊章也若乃言之
無文吾何敢以前說並駕或言下之理粗通大方亦所
不讓云

觀自在菩薩如意輪咒課法序

釋仁岳

隋祖智者說摩訶止觀約四種三昧示諸經行法讀者雖衆修者無幾何爲其然乎以人根庸淺法味清薄從師勞於名相事佛懈於資熏故十觀成乘五悔助道僅存空言矣予竊於講習之暇務求課念之益因發經藏得如意輪咒凡四本詳其文實同出而異譯也

一實義
難陀此

云覺喜唐天后久視元年譯八紙二阿彌真那此云寶思惟中宗神龍二年譯七紙三唐天后代三藏法師義淨譯三紙四唐天竺三藏法師章句既簡方軌且約遮菩提流志此云覺憂譯十九紙惡可以盡三障持善可以具二嚴先天竺法師諱遵式

常觀此經知利物之要特慶義淨所譯咒辭易誦乃鑲板模印詒厥四輩然而淨譯頗畧所說法式但云攝心口誦至於事儀觀想曾未點示受持之際意或缺如今輒采諸文爲之補助原始泊末總成七科一法式二觀想三禮讚四持誦五懺願六證驗七釋疑斯皆沿襲本經使源流之不別放則先制貴寘襄之有在知罪于我以俟來哲云

如意輪咒課法釋疑

釋仁岳

疑者曰觀音所說諸陀羅尼皆遮極惡盡持妙善覆膽

藹而無異鳴迦陵而不殊何故經云更無明咒與此觀
意咒王勢力齊者釋曰法有權實教有抑揚蓋言小乘
三藏大乘初門及歷別所談斯等明咒不能齊于圓頓
咒王也何以明之如法華普門品云受持觀世音名號
爲彼受持六十二億恒河沙菩薩名字是二人福正等
無異智者解云圓人惟一偏人則多格六十二億偏菩
薩等一圓菩薩也以彼例此人法雖異義旨攸同問流
志所譯廣明壇法分爲三院內院當中心畫如意輪觀
自在東面畫圓滿意願明至北面畫大勢至等外院東

面畫天帝釋左右畫諸天衆等今不依之而於道場但

安法寶并釋迦彌陀觀音之像將無返經之過歟答壇

法本爲咒三種藥

一佩藥二含藥三服藥

令世人民見聞歡喜而

相愛敬獲大勝願當候太陰太陽蝕時預二七日於閑

靜處築之乃至畫諸形像而爲供養今旣藥法不行所

以壇法亦寢况彼經前自云不暇占擇日月吉凶亦不

作壇故此廢之非爲過也如請觀音經中本無道場儀

式國清百錄令安佛像南向菩薩像東向斯出智者之

神襟耳今經菩薩旣須面西則依百錄不便予所敷置

非可以也蓋諸佛所師所謂法也故置之上級釋迦爲
娑婆之主彌陀爲觀音之師故左右焉菩薩居次級之
中亦不失其正也倘有方法異於見者當憐善從之問
證驗中既能殄滅一切痛苦成就一切事業今或親受
持積年而無所驗者何耶答機有親疎障有輕重機親
者心急加以觀慧機疎者心緩或惟讀誦定業障重不
定障輕機障對論大約則有四類差別經云若誦一遍
如上諸事悉皆遂意者此就機親障輕者言之亦誘進
之辭也若乃機疎障重纔方讀誦便責感應何其謬哉

古語云土性勝水掬壤不可以塞河金性勝木寸及不
可以殘林理必然矣又以臧惡例乎生善亦由宿植深
淺對於現機親疎致使休應遲速之異也是知聖無虛
授授於可受者書云皇天無親惟德是輔傳曰小信未
孚神弗福也但勤誦習功至自驗何芥蒂於胸臆乎先
民有以吉凶禍福在德不在命或曰在命不在德公孫
弘謂蔡紂行惡受天之罰禹湯文武積德以王天下此
在德也劉孝標謂仲由勵節不能息其結纓商臣弑逆
盛業光於後嗣此在命也斯皆偏一之見豈謂通方之

說苟迷三世因緣生法又何異久歿之類而論春秋之
變哉今之人亦有見積德而無驗惟賦命而是聽固執
美惡之運周而必復天數定矣詎假念聖人誦神咒爲
之移易乎又謂積德在念焉用事行凡厥求福則曰吾
福久矣吁挾邪距正蒙已蔽物末習滋甚其將奈何且
陰陽之流示災福之運俾人禳祈以慎咎悔若其天數
不可逃聖人不能救何故宋景一言法星三徙王謨免
刑戮於麾下

齊王玄謨性營貨財諫輔國將軍蕭斌麾下
下大失士心散亡略盡斌將斬之沈慶之

固諫乃止初將見斬玄謨夢火令念觀世音經千遍當
得免既覺念之百遍明日將刑猶念不輟忽聞傳唱停

刑徐義脫桎械於禁中

秦符丕左丞相徐義爲慕容永所獲械理其足將殺之念觀音

經至夜中桎械自脫於重禁之中若有人導之因遂得免遂奔楊佺期以爲洛陽令前志昭然安

可不信若言吾禱久矣請以近事驗于感應夫仁義不

行奸諂斯作人倫尙遠天道奚從至於款附勢權則靡

辭折節苟合富貴則無憚足恭由此觀之何禱於人而

不禱於佛乎縱是內有實德亦須外假善修何必土梗

其身木舌其口然後爲道哉故菩薩之行有緣因焉有

了因焉了謂正觀智德之基也緣謂助道福德之本也

如是二因譬車輪不可單運鳥翅不可隻飛課法所以

先觀想次禮誦等法兩全矣經云惟須深信不得生疑
故因撰錄聊此伸釋願諸聞見終身誦之

義學編序

釋仁岳

有引傳燈大珠和尚云捨垢取淨是生次業歷居士云
若捨煩惱入菩提不知何方有佛地以此句偈輕蔑淨
土者固未可也且不垢不淨之言卽心卽佛之義凡稟
釋教者孰不知之安以真如平等之談便廢因緣修證
之法六住大士尙存分段之生四果真人亦有變易之
滅云何殂落永謂泥洹須知菩薩未證妙覺已還常以

空心徧脩萬行終日觀佛無佛可觀歷劫度生無生可
度暫趣於空華淨土權依於幻化彌陀破昨夢之塵勞
入化城之地位乃至成佛雖自得冥寂而利他宛然故
喻之以明鑑之身現之以隨顛之像世人弗詢大義惟
忻頓悟直入無生而不思永嘉一宿覺云若實無生無
不生既豁達而取空恐莽蕩而招禍此顛乎越中習射
不踰數步之間隴西學游翻沒洄波之內如斯知識未
可參尋

論席解紛

釋仁岳

空名居士謂無已法師曰竊惟傳記所載始自晉時廬
山遠公與諸信士結香火之社願生西方乃請社中劉
遺民者爲誓文或曰斯乃教門權漸之方便若究觀根
極其惟息心達本是正脩行有唐雍州藍田釋法喜專
修禪業預知將歿大衆忽聞林北有音樂之聲因以告
喜喜曰世間果報久已捨之如何更生樂處乃默而入
定須臾樂聲便止喜亦端坐而終又唐京師釋曇倫臨
終有問往生何處荅云無盡世界於是寂然而化今詳
二師善逝正是泥洹絕境夫何遺身之徒求生淨土以

彼較此一何麤疎願卽兩端用祛未悟法師曰余問者
已聞楊公之書謂極樂爲示權誠乎忻猷取捨之說不
俟再問方欲連茹引而伸之今蒙致詰如弦得筈豈得
不發所言極樂爲權權必對實也請試陳之爲以小乘
是權大乘是實耶爲以有法是權無法是實耶若謂小
乘是權大乘是實者小乘中曾無一言勸讚往生十方
淨土故迦葉云但念空無相無作於菩薩法游戲神通
淨佛國土成就衆生心不喜樂若謂有法是權者何但
極樂是權至於泥洹皆是權耳故須菩提云若有法勝

於涅槃我說亦復如幻如夢由是言之忻泥洹而歎極樂亦猶逃峰赴壑俱不免於害也又若謂吾不取極樂亦不著泥洹曠然無朕不可擬議若爾則滅後無生何殊外道斷滅之見復有說云吾滅度後十方世界皆是我身何必定生西方極樂若爾則便同聖人曾現色像儻未證謂證大妄語罪其誰當之天台智者云常人聞生卽作生解聞無生卽作無生解不知生卽無生無生卽生橫相是非瞋他求生淨土幾許誤哉故知法喜不求於樂處曇輪示歸於無盡斯乃遺情離著之語必非

滅後永寂如空凡夫則循業受生聖人亦隨機利見况
法喜滅後降神於弟子曰吾欲露屍山野給施衆生等
豈非此身雖謝彼識猶生乎而指爲泥洹絕境者將何
以驗之且夫泥洹此翻滅度統括諸教其唯二焉若聲
聞泥洹者滅見思煩惱度分段生滅證偏空之理理既
偏矣空不能有故身土皆亡此方便之說也若諸佛泥
洹滅無明煩惱度變易生滅證中道之理理既中矣非
空非有故應化無窮此了義之談也今未審倫喜二師
是何泥洹若是偏空未免麤疎若是中道何名絕境今

之學人孰不謂卽心是佛觸目皆真寧勞乎轉物同如
亦已乎超毗越釋及乎根其所自核其所歸空空然冥
若夜游實貪恚之具存何忻厭而不起眷富貴如骨肉
顧貧賤如瘡疣於吾善者願欲升之太階於吾惡者恨
不戮之都市凡此之顛趾修淨土謂之忻厭者不知其
可也僧傳習禪篇中甚有苦節謹終之者或西務安養
或土忻知足慧真絕粒以行懺淨土然身以爲燈僧顯
現感於彌陀智晞明見於兜率莫謂此等皆是習俗靡
疎之人乎廬山遠公稀代之僧寶西域梵衆咸稱漢地

有大乘道士每燒香禮拜輒東嚮稽首豈迷圓頓之教
顯由權漸之門劉雷之徒皆晉世髦傑何詭說而隨之
乎而不知漸門多昧於往生頓教盛稱於淨土佛言讀
誦大乘方等經典善解義趣於第一義心不驚動斯爲
上品往生之業又天親云二乘種人不生極樂華嚴有
勸生之誡法華有記往之文十方如來出長舌相靡不
稱讚往生彼國彌勒問佛於此世界有幾菩薩生彼佛
國佛言有六十七億不退菩薩一一菩薩已曾供養無
數諸佛次如彌勒者也又佛言末世法滅之後特留無

皇壽經百年住世接引衆生以此證之如何芥視往生之人如何慕塞極樂之路所損至大可不謹乎

乞爲謝安置守冢禁樵採表

胡宿

春秋之記太上立德其次立功謂之不朽聖人之制能禦大災能捍大患則必見祭至於封表間墓禁止樵蘇尋所來而寔繁蓋難得而疏舉雖聖賢相去事業有間迹其大指所以褒德旌功而已竊見晉太傅謚文靖公謝安挺生江表忠存王室甫從衡門未褫韋帶已積台輔之暉便繫蒼黔之心及起東山相簡文帝摧相溫九

五之通破符堅百萬之衆名蓋當世功濟諸華號文武
之偉人爲風流之稱首張文規所撰吳興錄稱安墓在
長城縣南六十五里初墓建康之梅山爲陳始興王叔
陵發其冢裔孫夷吾爲長城令徙於縣南三鴉崗按長
城卽今長興縣臣昨受詔除出忝州任到官之日遂移
奉縣訪墳柏所在據大理寺丞知縣事裴大亮狀於縣
南萬安鄉三鴉崗訪得安冢墳地十畝有畸古老相傳
謂之謝墓田路去縣與吳興錄所載畧同墓旁社戶十
六歲時祭拜舊有叢祠不堪其陋臣量破公省錢委大

亮移置佳處重建祠堂凡屋二十道工往塑其像冠服
儀衛悉用當時之制然祠基差僻人迹罕至若無給復
之守恐罹樵牧之患昔信陵濁世之公子漢初蒙守冢
之給介推霸者之陪隸晉復啟環山之封况如安者高
德卓然雖人隔本朝功訖前世穆然清風猶在庶物臣
每見郊丘所肆赦前代忠烈立廟所在莫不申飭長吏
嚴加虔奉欲乞聖慈特降宸旨於安冢旁申禁樵採給
復五家以備洒掃守護之役勅州縣官吏歲時祠祭以
明聖朝紀元功褒有德之意

上葉學士書

清臣

李觀

省判學士執事觀生江楚間始數歲竊習其家書見晁董公孫之對問決科皆所以發天人之秘而彌縫國家之務漢往而唐聯幾百祀雖治亂相變而異人時有其稱得士之盛者率由是道及稍長鄉先生教以速化之術則謂當今取人一出於辭賦曰策若論姑以備數因歷觀場屋得雋者誠皆聲病靡靡之文而已借有材之高識之通以祿仕故不敢放其絕足越邪徑而趨大道腐儒慙筆喜幸多矣私心憤疾往往竊垂義士之涕將

恐古道萎絕不能復萌芽至年十六時聞禮部奏貢士
之可者賜第於殿廷所得多當世豪俊而執事之五策
實流行於天下募其本而觀之則審刑政之合違權利
之變將以富國便人而納之於禮義良今日之急務而
眾賢之所未知者也其辭典而瞻其意正而遙洋洋乎
古人之風復歸於筆下觀雖不肖用是感激竊喜置誌
流宕中亦有賢士大夫毅然執戈制淫辭而遵理道者
重遇主上之明有司之公權致高等足以風四表而移
士心矣自時而後積十餘年游目於書肆則熟執事之

文采侍坐於先進則飽執事之治聲窅然如望梧桐之
宮聽鳳凰之鳴徒知其諧和中律唯唯盈耳而雲霧隔
之終不克一見其容狀不意今茲旅食都下而執事方
在省局門牆伊邇有請覲之路是用上問與居以適所
願昔人有言曰惟賢知賢小人不欲自稱道顧可以當
執事之知乎伏念觀草茅匹夫受性不甚魯惟其心志
耿耿不忍自溺於流俗爲學必欲見根本爲文必欲先
義理晨夜探劬力盡弗迫而州郡不肯薦鄉黨不見稱
年近三十隕穫日甚昨者因謂京師忠賢所萃策試上

私奔走西轡將覲覲其萬一未及弛擔而貢舉已罷矣
羈棲輦轂兩經晦朔親老食盡又當歸寧踴躍而來恹
恹而返士林不鑑其道有位不知其名背仕進之門而
復入於寒餓之水火此亦烈夫好義所宜惜之也生平
爲文謹擇其二十四篇寫成一冊及所著明堂定制圖
一道并序草具其副塵諸左右莅事之暇時賜觀覽足
知覲心之所存焉冒黷威重伏增慚怖不宣覲再拜

御書閣牌

葉清臣

真宗文明武定章聖元孝皇帝光宅天下二十有五年

武威夷裔文經覆載禮修樂倭刑平政一天地並况震
于珍物乃東登泰山降禪社首西奠汾睢南遊罟縣典
章人物輝灼方夏飛昇騰實倬越古今天縱將聖典學
時敏百斤中程七行俱下謙延英俊寢尋經藝披編目
又照翰霄分帝庸賡歌道詣空宰聖有謨訓義光簡冊
休于萬麓留神小學三元秉煥八象流景丞相臣謂臣
拯相與之相侍從之臣發瑤笈披瓊蘊編第爲集凡三
百卷請從刊摹以傳永久制曰可景祐體天法道欽文
聰武聖神孝德皇帝續慶基按神統孝善繼志功能昭

前思先皇帝馨德茂烈巍巍郁郁聖言膺藻雲章日麗
非書之黃素縉于文錦檢于玉匣歲在石室則何以比
隆六籍昭厥萬祀於是同空止輿地之志職方辯九山
之物分道遺使咸錫其副則吳郡之虎丘存焉據姑蘇
之右地負乾陽之勝勢叢生萬石崛起平輦講席坦乎
千人劍泉研其百尺松篁總翠煙嵐異色宜有神物舍
於寶坊前此守土臣寔臣度初基尊奉卽山而宇寒暑
再離風雨無賴景祐四年十月知軍事臣堂始大前構
徹故以新奏取郡民絕籍財入縣官者錢一百七十萬

以授工材移通判軍州事臣宋卿經始慮素程工董役
摩日短昴訖于馳見更五甲子閣成費竹木章个八百
役夫兵手指二十二萬不出帑一金不調一民民不知
役而渠屋彌望凡爲巾櫨韞覆之物悉皆稱閣而具疏
繕密礎材理堅緻檣藻文枕光彩眩轉重檐四迴陽景
不曜飛陛橫出喬林在下熏厨凝香而負鼎縣奩含輝
而庠豁偉哉麗乎茲可以壯龜龍之負載倬靈漢之昭
明者已先是永熙宸翰九軸帝書一品垂賞軸幌彌歷
年所先朝寶跗入石冊六十二分輝奎曲并集爲賜今

皇帝飛雲灑妙黑本三十重光祖武廟有恩額至是落
成龕置其上三聖繼統昭明游藝若五展二曜珠連璧
合雖堯文禹律昌作武述何以過此惟堂以直清通欽
行已從政忠而愛君不以遠邇惟宋卿方嚴肅給裕民
急吏勤以辦事遂成休績斯書斯閣斯人之賴臣清臣
嘗爲史官記天子言動持使者符節得按察郡縣觀聖
文臨下之赫與守臣殿上之恭敬書始事銘於樂石詞
曰天有文華日星地有文秀崑嶙溟聖有文垂典經粵宋
二宗功邁德隆天律有融我皇定保繩武祖考華墨精

大人繼明三后重英儀鄰宣精香籤寶帙金匱石室
四方馳驛吳治長洲上當斗牛其鎮武丘茂林修竹龍
蟠虎伏其地惟福直有真文乃聖乃神撫臨其人守臣
推忠結宇再重與山比崇猗金簡有字韜于委羽惟道
家至藏訂諸蓬渚亶羣玉之山上符冊府天爲大宋是
則文化成世無極山斯朽石斯泐飛閣秘書時萬時億
景祐五年十月七日兩浙諸州水陸計度轉運副使提
點市舶司本路勸農使及管勾茶鹽課稅朝奉郎守太
常丞直史館騎都尉賜紫金魚袋臣葉清臣撰

脩邊策畧

葉清臣

王商在廷單于不敢仰視到都臨代匈奴不敢犯邊今
內則輔相寡謀綱紀不振外則兵不素練將不素蓄此
外寇得以內侮也慶曆初劉六符疑大國之有人藏奸
計而未發既見表裏遂肆陸梁只煩一介之使坐致二
十萬物永匱膏血以奉腥羶此有識之士所以爲國長
太息也今詔問北使詣闕以伐西戎爲名卽有邀求何
以答之若使辯捷之人判其曲直要之一戰以破其謀
豈不憚服苟不知咎或肆侵陵方河朔災傷之餘野無

廬舍縱令深入其能久居選擇驍勇過絕歸師設伏出奇邀擊首尾若不就禽亦且大敗矣詔問輔翊之能方面之才與夫帥領偏裨當今孰可以任此者臣以爲不患無人患有人而不能用爾今輔翊之臣抱忠義之深者莫如富弼爲社稷之固者莫如范仲淹諳古今故事者莫如夏竦議論之敏者莫如鄭戢方面之才嚴重有紀律者莫如韓琦臨大事能斷者莫如田況剛果無顧避者莫如劉渙宏達有方畧者莫如孫沔至於帥領偏裨貴能坐運籌策不必親當矢石王德用素有威名范

仲淹深練軍政龐籍久經邊任皆其選也狄青范全頗
能馭衆蔣偕沉毅有術畧張亢個儻有膽勇劉貽孫材
武剛斷王德基純慤勁勇此可補偏裨者也詔謂朔方
災傷軍儲缺乏此則三司失計置轉運使不舉職既往
固已不咎來者又復不追臣未見其可也比日多以卑
官殲請厚奉或身爲內供奉而有遙刺之給或爲觀察
使便占留後之封俸門日開賜予無藝若令有司執守
率循舊規庶幾物力亦獲寬弛詔問戰馬之絕如何可
使足用臣前在三司嘗陳監牧之弊占良田九萬餘頃

歲費錢百萬緡天閑之數纔三四萬急有征調一不可
用今欲不費而馬立辦莫若賦馬於河北河東陝西京
東西五路上戶一馬中戶二戶一馬養馬者復其一
丁如此則坐致戰馬二十萬匹不爲難矣

姚璘論

余靖

古者天子之立史官也不獨紀歲月遠近辯朝會同異
而已矣蓋以王者居億兆之上喜任陽春怒如雷霆
尊生殺無不從也故立史以謹其言動動則在史書之
言則有史書之以示後嗣欲其畏後世之名而不敢過

舉者也竊見兩漢而下有唐制度最爲詳備而史官廢
置未臻大中敢試論之唐之修史其術有二武德故事
小省之官更直近陛執筆對仗隨而撰錄書之方冊謂
之起居注姚璹建議彙鈎之臣訐謨便殿嘉猷善經退
必編次送之史館謂之時政記於是周官六史之職不
復覲敘矣累朝著作之局不復刊修矣璹議既行而起
居之官立於外朝使退之後跡便疏遠雖延英數刻之
對聖人有泣辜解網之言應機成務之謀不可得而聞
也若非宰臣撰述則軍國政要何由知之繇是而言有

不可者三焉古者帝王不得見常代之史何則史之爲書不隱惡不虛美謂之實錄史而可見則其臣不敢以實書書而不實爲已誣矣實而不諱爲已戮矣不得見史者以此也宰臣監修是使自司其過者也其不可者一也昔者成王尙幼與唐叔戲剪桐葉而與之曰以是封汝明日太史上輿地圖請封唐叔自是成王終身無戲言夫是則史官常在左右也今史臣隨使出入則是用史臣於頃刻之間耳戲言過行尙奚史之畏哉其不可者二也古者大臣不掌注記故董狐得以直筆於晉

南史氏得以執簡於齊設有史官外朝旣罷則目不見
帝王之容耳不聞帝王之言近臣奏對孰邪孰正孰誣
孰諍咸莫之辨也用他人注記爲己之筆削夫是則史
官失職莫甚於此其不可者三也語曰使廉士守藏不
如倚鑰之固也使義士分財不如投鉤之平也何則有
情之與無情也夫以廣淵之謀居翊亮之位緝熙庶績
裁成萬機而復代史臣撰述固亦勞矣向使房杜姚宋
擊轂馳而自序策畧人猶疑之脫不幸而有元載盧杞
當其任則安所取信哉太宗文皇帝正觀中所論政體

皆可冠冕古今粉澤王度著在方冊昭昭然者史臣得侍於內朝故也姚璿雖知注記之詳未知先王立史之意一失其源而莫之敢議惜哉

陳聖俞秘書丞制

王安石

勅某爾以賢良應詔朕嘗親冊而秩以京官幕府三年序遷一等此特有司之常法爾豈所以待異能之士哉往其勉之以俟時用可

前鄉貢進士許將大理評事簽書昭慶軍節度判

官廳公事制

王安石

先帝親第進士於廷而以爾爲第一爾於藝文可謂能
矣所以施於政者朕將有所試而觀焉夫士之遇時不
患無位思所以立往其勵勉以副來求可

舉陳樞充錢穀職司狀

王安石

前件官明敏方直有政事之材臣奉使江東時樞爲旌
德縣令聽訟鞠獄尤爲精明隨所施設皆有方畧

送孫正之序

王安石

時然而然衆人也已然而然君子也已然而然非私已
也聖人之道在焉爾夫君子有窮苦顛跌不肯一失詘

已以從時者不以時勝道也故其得志於君則變時而
之道若反手然彼其術素脩而志素定也時乎楊墨已
不然者孟軻氏而已時乎釋老已不然者韓愈氏而已
如孟韓者可謂術素修而志素定也不以時勝道也惜
也不得志於君使真儒之效不白於當世然其於衆人
也卓矣嗚呼予觀今之世圓冠義如大裾襜如坐而禿
言起而舜趨不以孟韓之心爲心者衆異衆人乎予官
於揚得友曰孫正之正之行古之道又善爲古文予知
其能以孟韓之心爲心而不已者也夫越人之望燕爲

絕域也北轅而首之苟不已無不至孟韓之道去吾黨
豈若越人之望燕故以正之之不已而不至焉予未之
信也一日得志於吾君而真儒之效不白於當世予亦
未之信也正之之兄官於溫奉其親以行將從之先爲
言以處予予欲默安得而默也慶曆二年閏九月十一
日

通州海門興利記

王安石

余讀國詩以其婦子饁彼南畝田畯至喜嗟乎圃之人
帥其家人戮力以聽吏吏推其意以相民何其至也夫

喜者非自外至乃其中心固有以然也旣嘆其吏之能
民又思其君之所以待吏則亦欲善之心出於至誠而
已蓋不獨法度有以馭之也以賞罰用天下而先王之
俗廢有士於此能以卹之吏自爲而不苟於其民豈非
所謂有志者邪以余所聞吳興沈君興宗海門之政可
謂有志矣旣隄海北七十里以除水患建大浚渠川隴
取江南以灌義寧等數鄉之田方是時民之墊於海浬
吟者相屬君至則寬禁緩求以集流亡少焉誘起之以
就功莫不蹶蹶然奮其億而來也由是觀之苟誠愛民

而有以利之雖剝殘窮敝之餘可勉而用也況於力足者乎興宗好學知方竟其學又將有大者焉此何足以盡吾沈君之才抑可以觀其志矣而論者或以一邑之善不足書之今天下之邑多矣其能有以遺其民而不愧於國之吏者果多乎不多則予不欲使其無傳也至和元年六月六日臨川王某記

與孫仲書三首

王安石

某頓首辱書具感恩意之厚先人銘固嘗用子固文但事有缺畧向時忘與議定又有一事須至別作然不可

以書傳某於子固亦可以忘形迹矣而正之云然則某不敢易矣雖然告正之作一碣立於墓門使先人之名德不泯幸矣子固亦近得書甚安樂云不復來此遂入京恐欲知故及此朱氏事固如足下說而朱祕校乃已入京考於禮蓋亦皆如足下之說但愁痛不能具道此意以質於賢者耳銘事子固不以此罪我兩人者以事有當然者且我兩人與子固豈當相求於形迹間耶然能不失形迹亦大善惟碣宜速見示也某憂痛愁苦千狀萬端書所不能具以此思足下欲飛去可以言吾心

所欲言者惟正之子固耳思企思企千萬自愛

某辱手筆感媿近亦聞正之喪配未敢卽問人生多難
乃至此乎當歸之命耳人情處此豈能無愁但當以埋
遣之無自苦爲也然此乃某不能自勝者二年之間愁
鬢相仍居常忽忽不自聊勉從俗往還其心惟欲閉門
坐臥耳欲往奉見久矣況以書見趣乎親老常多病生
事懷迫如坐燒屋之下不可以一日輟而不圖其能遠
來千里之外乎欲足下一至廣德某當走見矣爲十日
之會亦足以晤言矣或潤州亦可也諸侯面論此不復

云矣正之或來潤或廣德不可復以他爲解矣某甚重
去親側若正之難來此亦無所係着但至潤及廣德尤
爲易耳

某到京師已數月求一官以出旣未得所欲而一舟爲
火所燔爲生之具畧盡所不燔者人而已家人又頗病
人之多不適意豈獨我乎然足下之親愛我良厚其亦
欲知我所以處此之安否也故及此耳知與公蘊居甚
適何時當邂逅以少釋愁苦之心乎且頗以書見及某
自度不能數十日亦當得一官以出但不知何處耳子

高當已入京不知得及相見於京師否諸不一一于萬
自愛

荅孫少述書

王安石

少述足下某天稟疎介與時不相值生平所得數人而
已兄素聞知之置此數人復欲強數指不可謂惟接兄
之日淺而相愛深別後焦然如失所憑兄賜問者八九
奉荅卒不過一再而已以爲吾黨之相與情誼何如爾
問之密疎不足計也不然今之游交竿牘之使午行於
涂豈其於兄顧不能盡此月抵真州明日當舟行無事

爲朱先生敘字且廢所賦詩以寄元珍六月代去民
先受鄆辟爲之奈何近日人事可嗟可恠者衆何時見
兄論之春暄自重

謝林肇長官啟

王安石

伏蒙貶損猥先臨存方以出行渠川未嘗得望車騎繼
陳悃悃敘謝高明敢圖仁人見遇如舊申錫重問相存
有加惟賤且貧尤愚不肖學焉昧道仕則曠官荷推褒
之過情處負媿以終日三陽肇歲萬物同春戎惟賢明
休有祉福以時自壽良副所瞻

朝奉郎尚書司封員外郎張君墓誌銘

王安石

君諱禔字聖休餘杭人曾祖曰浩祖曰文寶弗仕考曰延遇仕至左侍禁贈官至左驍騎將軍君少孤與其弟祗皆文行知名以布衣教授宗室後中進士第歷宣城縣主簿撫州司法叅軍用舉者遷大理寺丞知雅州名山洪州奉新兩縣監海州權貨務通判池廣兩州乃自尚書屯田員外郎召拜殿中侍御史用磨勘遷侍御史劾奏殿前都指揮使郭承祐恃恩驕嫚論宦官雖高不

當坐侍燕而謫請求者又論不當黜諫官御史風聞言
事仁宗皆以爲然君之爲吏也數決疑獄所至稱辨治
及是言事又能舉其職方是時爲御史者拔舉多不次
君素寬裕靜退耻以彈治人得用未幾卽稱疾求出乃
知安州州大治會季人追喪車慟哭初驍騎府君監湖
州兵遂葬卞山至是君從葬云銘曰有嘉張君質靜寬
徐進非所好人用稱譽視利在前踴循弗趨退施一州
用智之餘嘻其墓矣次有銘書

祭銀青章相公文

釋淨端

維某年月日謹以宇宙爲晷明月爲奠祭於章公之靈
曰了本真性上升安養玉福生臻子孫將相千足萬足
伏惟尙饗

湖州吳山端禪師語錄序

劉誼

禪師諱淨端字明表族姓丘氏本貫湖州歸安人也受
業吳山解空院得灋於臨安龍華院齊嶽禪師一叅宗
匠頓悟全機解不存玄見量頽脫三千灋席衆少投機
還隱本山自號安閒和尚諠行將赴官南方因入山禮
師又有偈贈曰天公不見過祇爲肚皮大奉勸劉宜翁

爲官依此做言詠玄妙於里中石壁間詩頌頗多皆如
寒山拾得之流諦實至理或有可觀師以無礙辨才中
傳富於有緣灑施故序

請端禪師住持長興壽聖禪寺疏

劉 誼

壽聖舊非禪刹罕見衲僧吳山久隱作家還同古佛亟
于太守願得高人恭惟禪師乃夙悟大乘弗拘小節縱
橫妙用出處不羈勘破回頭撞翻不托麤言細語皆是
上機糲食惡永惟修密行慣遊遊於城市常笑傲於林
泉瀟灑餘清徜徉雅惜幽雲虛室七軸蓮經皓月空潭

一聲漁父况茲所好豈是不佳若也爲人何妨行化衆
心皆喜思作禮於象王十目具瞻願飯

次於佛子既傳
反請寧假譙辭

曾公巖記

劉誼

元豐元年冬交人入貢上方擇人處置事乃詔曾公自
廣州移帥桂府二年南方無事民和歲豐公以其餘暇
訪尋桂之山水奇勝處一日率郡僚遊所謂風洞者縱
步而東行得一巖於榛莽間巖之前有石爲之門屈曲
而入則流水橫其卑碧乳垂其上周環而視其狀如雕
鐫刻鏤殆出於鬼工而不類於融結者也公於是拂石

求前人之跡則未嘗至者焉乃構長橋跨中流而渡以爲遊觀宴休之處且與衆共樂之自是州人士女與夫四方之人無日而不來其巖遂爲桂林絕觀夫桂之洞穴最多南而白龍北有石門廻穴據其東隱山在其西皆唐名流之所嘗遊也觀其咏歌序刻莫不極道其勝槩而嘆前人之所遺者斯巖之景亦冠絕矣而乃獨遺之是真可歎也已豈當時忽於尋訪而不見耶將唐人所謂天作而地設之必得其人而後顯耶余生長東吳號爲山水窟中如天台雁蕩最爲奇觀然未有過此者

也邦人樂公之德政而願以曾公名其巖以此其樂之
思余故爲書之且以告後人收入爲圖經勝事云公名
布字子宣其年九月二十六日管勾本路常平前江山
縣丞劉誼記

與陳令舉賢良書

釋契嵩

某啓自湖海冒雪相過已數月矣別後但眷眷然仲秋
時接所示書乃知令舉至官甚善不以遷謫介意公餘
揭牕對雲而坐道情清勝乃下視塵俗超然目樂雖自
樂天九江之時何以過之風聞人但景服不暇令舉當

世賢豪更以外物自如此其清規素德益絕人遠矣老
弊浮雲落葉飄泊尚若不定雖有陪三峽五老之興安
得遂之猶遠高論萬念善保尊履不宣